



20. 09. 2013. godine

Izjava misije MMF-a za Bosnu i Hercegovinu

Misija Međunarodnog monetarnog fonda (MMF-a) koju je predvodio gosp. Ron van Rooden posjetila je Banja Luku i Sarajevo u periodu od 04.-- 19. septembra/rujna 2013. godine kako bi vodila razgovore o nedavnim ekonomskim dešavanjima i politikama u okviru četvrtog pregleda po Stand-by aranžmanu (SBA) sa Bosnom i Hercegovinom. Na kraju posjete gosp. van Rooden je dao sljedeću izjavu:

“Ekonomija Bosne i Hercegovine pokazuje znake oporavka te bilježi rast izvoza i proizvodnje. Očekujemo da će ove godine stopa rasta dostići skoro 1 posto, i projiciramo dalji rast naredne godine u skladu sa trendovima u Europi. Međutim, značajni rizici negativnih trendova su i dalje prisutni. Stopa nezaposlenosti je još uvijek neprihvatljivo visoka.

Tokom ove godine vlasti ostvaruju kontinuiran napredak u okviru SBA, programski ciljevi postavljeni za kraj juna/lipnja 2013. godine su ispunjeni. Međutim, značajni izazovi se naziru u narednom periodu. S tim u vezi, da bi se ostvarili ciljevi programa od ključnog je značaja osigurati da ekonomske politike ostanu na pravom kolosjeku.

Izvršenje budžeta se posebno suočava sa značajnim poteškoćama. Naplata indirektnih poreza zaostaje za povećanjem ekonomskih aktivnosti, što je uz pad nekih drugih prihoda i nove inicijative na strani rashoda, stvorilo deficite u budžetima vlada. Budžeti za 2013. godinu, koji su usvojeni u decembru/prosincu, bili su u skladu sa daljim smanjenjem konsolidovanog deficita generalne vlade na nešto više od 2 posto BDP-a (sa 5 ½ posto BDP-a u 2009. godini). Ostvarivanje ovog cilja će, međutim, zahtijevati dodatna prilagođavanja, posebno u Republici Srpskoj. Takođe, biće potrebno da se novi zakon o penzijama ostvarenim pod povoljnijim uslovima, koji je usvojen ranije ove godine u Federaciji, u potpunosti provodi te da se revizije korisnika prava neometano nastave. Ovo će osigurati da sistem bude ne samo socijalno pravedan već i finansijski održiv te sposobna da zaštiti starosne penzije. Istovremeno, od esencijalne važnosti je poboljšati naplatu indirektnih poreza.

U tom kontekstu, misija je s vlastima razgovarala o politikama koje bi omogućile postizanje fiskalnih ciljeva postavljenih za kraj 2013. godine. Misija očekuje da će sa vlastima finalizirati detalje ovih politika u narednim sedmicama. Nadalje, od krucijalne važnosti će biti da prilikom priprme budžeta za 2014. godinu vlasti osiguraju da se dobiti ostvarene do sada na fiskalnoj konsolidaciji sačuvaju te da javni dug čvrsto ide silaznom putanjom.

Zbog veoma visoke nezaposlenosti od ključnog značaja je da Bosna i Hercegovina postane privlačnije mjesto za investicije i otvaranje novih radnih mjesta. Vlasti rade na unapređenju poslovnog okruženja olakšavajući proces otvaranja i rada poslovnih subjekata i pripremaju nove zakone o radu koji su u većoj mjeri poticajni za stvaranje radnih mjesta. Najbolji način da se ostvari ovaj cilj jest kroz konstruktivan dijalog sa svim interesnim stranama, uključujući sindikate i predstavnike poslovne zajednice, uzimajući takođe u obzir i interese onih koji su trenutno bez posla.

Misija će u narednim sedmicama raditi sa vlastima na jačanju politika koje bi omogućile da Izvršni odbor MMF-a uzme u razmatranje četvrti pregled po SBA.“

Kontakt osoba za odnose sa medijima:

Silvia Zucchini

szucchini@imf.org

Tel: +1 202-623-7100